



Broj: 05-04-20-75-9/26
Maglaj, 19.02.2026. godine

Na osnovu člana 70., u vezi sa članom 64. stav (1) tačka a) Zakona o javnim nabavkama („Službeni glasnik BiH“, br. 39/14, 59/22 i 50/24), člana 25. Pravilnika o javnim nabavkama u Općini Maglaj („Službene novine Općine Maglaj“, broj 13/22) i člana 42. Statuta Općine Maglaj („Službene novine općine Maglaj“, br. 8/07, 3/08, 6/08 i 6/24), a u vezi sa Zapisnikom o pregledu i ocjeni ponuda, broj 05-04-20-75-8/26 od 19.02.2026. godine, u postupku javne nabavke „Izgradnja dijela distributivne vodovodne mreže u naseljenom mjestu Poljice u Maglaju“, Općinski načelnik donosi

ODLUKU

o izboru najpovoljnijeg ponuđača

I

Prihvata se preporuka Komisije za javne nabavke i ugovor o nabavci radova na izgradnji dijela distributivne vodovodne mreže u naseljenom mjestu Poljice u Maglaju, dodjeljuje se ponuđaču „Hajdić“ d.o.o. Maglaj, u skladu sa ponudom broj 05/26 od 10.02.2026. godine, po ukupnoj cijeni od 8.012,60 KM bez PDV-a, odnosno 9.374,74 KM sa uračunatim PDV-om.

II

Izabrani ponuđač iz tačke I obavezan je dostaviti dokumentaciju koja je tenderskom dokumentacijom utvrđena kao dokumentacija koju dostavlja izabrani ponuđač, u roku od pet dana od dana zaprimanja ove odluke.

III

Za realizaciju ove odluke zadužuje se Služba za urbanizam, geodetske i imovinsko-pravne poslove Općine Maglaj.

IV

Ova odluka dostavlja se svim ponuđačima koji su učestvovali u postupku javne nabavke i ima se objaviti na internetskoj stranici Općine Maglaj.

O b r a z l o ž e n j e

Odlukom o pokretanju postupka, broj 05-04-20-75/26 od 20.01.2026. godine, pokrenut je postupak javne nabavke „Izgradnja dijela distributivne vodovodne mreže u naseljenom mjestu Poljice u Maglaju“, putem otvorenog postupka. Predmetna nabavka objavljena je na portalu javnih nabavki, Obavještenje o nabavci broj 1140-1-3-11-3-9/26 od 20.01.2026. godine. Sažetak obavještenja o nabavci objavljen je u „Službenom glasniku BiH“, broj 5/26.

Procijenjena vrijednost nabavke je 13.247,86 KM bez PDV-a, odnosno 15.500,00 KM sa uračunatim PDV-om. Kriterij za dodjelu ugovora je ekonomski najpovoljnija ponuda, sa potkriterijima „cijena“ (ukupno 98 bodova) i „rok plaćanja“ (ukupno 2 boda).

Predmetni postupak je, u skladu sa svojim nadležnostima, provela Komisija za javne nabavke imenovana Odlukom Općinskog načelnika, broj 05-45-1-926/25 od 22.05.2025. godine (u daljem tekstu: Komisija). U toku postupka, Komisija je zaprimila pristigle ponude, izvršila njihovo otvaranje, pregled i ocjenu, prema zahtjevima i kriterijima iz tenderske dokumentacije, o čemu je sačinila odgovarajuće zapisnike, u skladu sa čl. 63. stav (5) i 65. stav (2) Zakona o javnim nabavkama.

U predmetnom postupku, Komisija je utvrdila da je blagovremeno zaprimljeno sedam ponuda, prema redoslijedu zaprimanja kako slijedi:

r/ b	Naziv ponuđača	Sjedište ponuđača	Datum i vrijeme zaprimanja	Broj protokola
1.	“Ikan” d.o.o. Zavidovići	Mečevići bb, Zavidovići	09.02.2026. 08,37h	1004
2.	“Huke” d.o.o. Žepče	Golubinja bb, Žepče	09.02.2026. 09,02h	1008
3.	“KJD” d.o.o. Maglaj	Ulica mladih 4, Maglaj	09.02.2026. 13,46h	1056
4.	“Hajdić” d.o.o. Maglaj	Misurići bb, Maglaj	09.02.2026. 14,30h	1057
5.	“Geo-put” d.o.o. Maglaj	Poljice bb, Maglaj	10.02.2026. 07,20h	1059
6.	GP “Heldovac” d.o.o. Žepče	Ljeskovica bb, Žepče	10.02.2026. 08,51h	1060
7.	“Pervan Bau” d.o.o. Žepče	Ponijevo bb, Žepče	10.02.2026. 08,55h	1061

Komisija je, prilikom otvaranja ponuda, konstatovala da su zaprimljene ponude prihvatljive prema formi, obliku i potpunosti, odnosno dostavljene su u zatvorenim kovertama, na kojima su bili navedeni svi podaci traženi tenderskom dokumentacijom. Komisija je potom, na zatvorenoj sjednici, izvršila pregled i ocjenu ponuda, kako bi utvrdila da li iste ispunjavaju zahtjeve u pogledu ponuđene cijene, predmeta nabavke, kvalifikovanosti ponuđača i ostalih uslova traženih tenderskom dokumentacijom.

Komisija je prihvatljivim ocijenila ponude ponuđača „KJD“ d.o.o. Maglaj, “Hajdić” d.o.o. Maglaj i GP “Heldovac” d.o.o. Žepče.

Komisija je neprihvatljivom ocijenila ponudu ponuđača „Geo-put“ d.o.o. Maglaj iz razloga što nije dokazao da posjeduje ranije iskustvo u izvođenju radova koji su srodni radovima koji su predmet ove nabavke. Naime, ponuđač je, kao dokaz da posjeduje relevantno iskustvo, dostavio Potvrdu “Natron-Hayat” d.o.o. Maglaj, broj R-30/25 od 22.01.2025. godine, o izvršenim radovima u krugu ove kompanije u 2024. godini i Potvrdu “Natron-Hayat” d.o.o. Maglaj, broj R-15/26 od 15.01.2026. godine, o izvršenim radovima u krugu ove kompanije u 2025. godini. U navedenim potvrdama pobrojani su izvršeni radovi, međutim Komisija je konstatovala da se ništa od navedenog ne odnosi na radove na vodovodnoj mreži, a što je predmet ovog postupka. Komisija kao srodne radove nije prihvatila izgradnju cjevovoda povratne vode na deponiji šljake Nekolj i izgradnju kanalizacionog voda DN500, s obzirom da, premda se radi o građevinskim radovima na cjevovodima koji imaju neke zajedničke karakteristike, oni nisu u dovoljnoj mjeri srodni, jer su u pitanju zahvati koji se bitno razlikuju prema svojoj funkcionalnoj namjeni, tehničkim karakteristikama, uslovima izvođenja i regulatornom okviru. Predmet ovog postupka nabavke su radovi na vodovodnom sistemu za distribuciju pitke vode, dok je cjevovod povratne vode dio industrijskog tehnološkog procesa, a kanalizacioni vod DN500 dio sistema odvodnje otpadnih voda. Imajući u vidu navedeno,

Komisija je zaključila da su u pitanju drugačija tehnička rješenja, hidraulički principi i građevinski uslovi, te konstatovala da navedeni radovi ne posjeduju dovoljan stepen srodnosti sa radovima koji su predmet ovog postupka nabavke, zbog čega je ponudu ovog ponuđača ocijenila neprihvatljivom.

Od preostalih ponuđača traženo je pojašnjenje referenci, u skladu sa članom 48. stav (5) Zakona o javnim nabavkama, kako bi se utvrdilo da li ponuđači posjeduju iskustvo u izvođenju radova koji su srodni radovima koji su predmet ovog postupka nabavke, te u skladu s tim izvršila evaluacija njihovih ponuda. Ponuđači "Huke" d.o.o. Žepče i "Pervan Bau" d.o.o. Žepče nisu dostavili tražena pojašnjenja, te su njihove ponude odbačene. Ponuđač "Ikan" d.o.o. Zavidovići je na zahtjev za pojašnjenje referenci odgovorio dopisom koji ne sadrži zahtijevano pojašnjenje, te je Komisija i njegovu ponudu odbacila kao neprihvatljivu.

Razmatrajući preostale prihvatljive ponude, Komisija je utvrdila da je ponuda ponuđača "Hajdić" d.o.o. Maglaj za više od 20% niža od drugorangirane prihvatljive ponude, te je od ponuđača zatraženo je obrazloženje ponuđene cijene, u skladu sa članom 66. Zakona o javnim nabavkama i članom 17. stav (7) tačka b) Uputstva za pripremu modela tenderske dokumentacije i ponuda. Ponuđač je blagovremeno dostavio traženo obrazloženje, koje je Komisija prihvatila i njihovu ponudu ocijenila prihvatljivom.

E-aukcija nije provedena. Komisija je izvršila rangiranje prihvatljivih ponuda u skladu sa kriterijima i metodologijom utvrđenom u tenderskoj dokumentaciji, Konačna rang lista, prema kriteriju za izbor ponude je sljedeća:

r/ b	Naziv ponuđača	Cijena (bez PDV-a)	Bodovi po kriteriju cijena	Rok plaćanja	Bodovi po kriteriju rok plaćanja	UKUPAN BROJ BODOVA
1.	"Hajdić" d.o.o. Maglaj	8.012,60	98	60 dana	2	100
2.	GP "Heldovac" d.o.o. Žepče	11.685,00	67,20	60 dana	2	68,20
3.	"KJD" d.o.o. Maglaj	12.000,01	65,44	60 dana	2	67,44

Po završetku poslova koji spadaju u njenu nadležnost, Komisija je sačinila zapisnik o pregledu i ocjeni ponuda, u kojem je detaljno navela sve informacije relevantne za predmetni postupak, kao i preporuku rukovodiocu ugovornog organa da ugovor za nabavku radova na izgradnji dijela distributivne vodovodne mreže u naseljenom mjestu Poljice u Maglaju dodijeli ponuđaču „Hajdić” d.o.o. Maglaj. Preporuka je, zajedno sa izvještajem o radu Komisije, dostavljena rukovodiocu ugovornog organa 19.02.2026. godine.

U postupku donošenja ove odluke, posebno su cijenjene činjenice da je Komisija, sastavljena od stručnih lica, pravilno i potpuno izvršila ocjenu kvalifikovanosti ponuđača, te ocjenu pristiglih ponuda, u skladu sa kriterijima iz tenderske dokumentacije. Ugovorni organ nije našao nepravilnosti niti propuste u radu Komisije, koji bi eventualno bili osnov za neprihvatanje date preporuke za izbor najpovoljnijeg ponuđača i dodjelu ugovora. Uvidom u priloženu dokumentaciju, utvrđeno je da je Komisija u svemu pravilno postupila, u skladu sa svojim ovlaštenjima i relevantnim propisima, detaljno obrazlažući svoje radnje u svim fazama

postupka, zbog čega je ugovorni organ utvrdio da je izbor najpovoljnijeg ponuđača izvršen u skladu sa Zakonom o javnim nabavkama, podzakonskim aktima i tenderskom dokumentacijom.

Na osnovu izloženog, a primjenom člana 64. stav 1. tačka a) Zakona o javnim nabavkama, odlučeno je kao u dispozitivu.

POUKA O PRAVNOM LIJEKU: Protiv ove odluke može se izjaviti žalba Uredu za razmatranje žalbi, putem ugovornog organa, Općine Maglaj, u roku od deset dana od dana prijema ove odluke.

DOSTAVLJENO:

1. Ponuđači – putem maila
2. Služba za urbanizam, geodetske i imovinsko-pravne poslove
3. Web stranica
4. a/a



OPĆINSKI NAČELNIK

Maid Suljaković